

HTESALONI Pê Chyáng Htang Dàm Hun Kat é Laiká (2 Thessalonians)

¹ Ngò Poluq eq Sila, Timohti pé gi, nga-nhông é Íwa Garai Gasang eq Yhumsîng Yesuq Hkrisduq má nghut nyî bê bang, haû Htesaloni wà mó byu pê é noqkuq hpúng lé dang kyô kat lhê.

² Haû Íwa Garai Gasang eq Yhumsîng Yesuq Hkrisduq chyáng mâ é jeju eq nguingón hkyô gi, nungmoq chyáng ru joq nyî sháng gaq ô!

Jeju Hkya-on É Eq Kyûdûng É Hkyô

³ Gumang wuê ê, ngamoq gi, hkâ-nhám le, nungmoq é matú Garai Gasang lé jeju hkya-on râ dút ri; haû gi, gíng lhê; hkâsu mù gâ le, nungmoq é lumjîng myit gi, je je kô jat lo nyî luî, nungmoq yuq hkgámó é chyitdap myit le, rayuq eq rayuq é ahtoq má je myô jat lo nyi é yanmai nghut lhê.

⁴ Haû mù luî, ngamoq gi, nungmoq zing-ri huî é hkyô pé eq wuîhke jamjau huî é hkyô pé banshoq lé, nungmoq wó jân nyî kô é yanmai, nungmoq é hkam jan hkyô eq lumjîng hkyô lé, Garai Gasang é noqkuq hpúng pê é hí má gumrong nyi lhê.

⁵ Shí hkyô banshoq gi, haû Garai Gasang dingmán é dông jéyáng é hkyô lé saksé tûn shit é nghut lhê; haû mù luî, nungmoq gi, Garai Gasang é mingdán é matú wuîhke jamjau hui zo bekô nghut é yanmai, mingdán haû eq gingdán é bang gâ é hui kó râ nghut lhê; ⁶ Garai Gasang gi, tengmán

Sû nghut lhê; haû mù, nungmoq lé jamjau byî é bang lé, Yhang mai jamjau byi râ eq, ⁷ jamjau huî nyi é bang nungmoq lé le, ngamoq lé le lhoq lhut byi râ nghut lhê. Shí hkyô gi, haû Garai Gasang lé a sê é bang eq nga-nhông é Yhumsîng Yesuq eq sêng é gabú danglù lé a gyo a châng é bang lé, jéyáng râ matú, ⁸ haû Yhumsîng Yesuq, wum-o a-tsam byíng é Yhâng é maumang lagyô pé eq rahá, myishâm eq mauhkûng mai htoq shit é hkûn, dut râ nghut lhê. ⁹ Yesuq jé lé lô mù, Yhâng é chyoiyúng bang má hpungwup shingkang wó yu é eq lumjîng bang banshoq mai mauhong é huî é buinyî má, yhangmoq gi, htên byoq hkyô lé ahtum abyuq jéyáng é hui zo kó râ nghut lhê. ¹⁰ Hau htoq agó, haû Yhumsîng é hí mai le, Yhâng é a-tsam kô làm é mai le, lhoq kâng pyâm é hui kó râ nghut lhê. Ngamoq é saksé dang lé nungmoq lumjîng bekô nghut é yanmai, haû lumjîng bang má nungmoq le lôm bekô nghut lhê.

¹¹ Haû mù luî, nga-nhông é Garai Gasang gi, nungmoq lé, Yhang ji yu é hkyô eq gingdán ri ga râ le, haû Yhang é wum-o a-tsam mai, nungmoq myit tô é ge é hkyô hkangmó eq nungmoq é lumjîng myit eq sêng é muzó lhumjup lé, lhoq dik byi sháng gaq nghû le, nungmoq é matú, hkâ-nhám le, ngamoq kyûdung byî nyi lhê. ¹² Ngamoq haû su dung byî nyi é hkyô gi, nga-nhông é Garai Gasang eq Yhumsîng Yesuq Hkrisduq é jeju yanmai, haû nga-nhông é Yhumsîng Yesuq é myîng gi, nungmoq má hkya-on waq toq é wó hui mù, nungmoq gi, Yhang má hkya-on waq toq é wó hui kó râ matú nghut lhê.

2

A Tara É Sû

¹ Gumang wuì ê, haû nga-nhông é Yhumsîng Yesuq Hkrisduq dum lé râ hkyô, Yhang eq nga-nhông rahá zup nyi to râ hkyô eq séng luî, nungmoq lé ngamoq pying kat nau é gi, ² haû Yhumsîng é buinyì gi, jé to gù nghut bê gâ é myiqhtoi dang, luhkyang, laiká pé rajung jung, ngamoq chyáng mâ é nghut lhê ga nungmoq chyáng jé é nghut jáng, nungmoq é myit lui za hkâduì kó, hkâgyuq dân kó. ³ Hkâsu mù gâ le, haû htên byoq é yhangzo nghut é a tarâ Sû htoq shit luî, haû gumlau toq é hkyô hí a htoq htoq gi, buinyì haû jé râ a nghut, haû mù luî, nungmoq lé, ó yuq èq, hká dông mai mhaú kôlhang hkâjîng kó. ⁴ Haû yuq gi, Garai ga noqkuq huì é zè lhunglhang lé htuq htíng luî, haû pé banshoq é htoq má yhânggùng yhang lhoq gyaú yû râ nghut lhê; haû mù luî, Garai Gasâng é noqkuq yhûm má zung to luî, yhânggùng yhang Garai Gasang nghut lhê ga taí râ nghut lhê.

⁵ Ngò gi, nungmoq eq rahá nyi tô é hkûn, shí hkyô pé lé lhaq taí kyo kyo kut é hkyô lé, nungmoq a bun lo kó lhú? ⁶ Haû yuq gi, ahkyíng yam-yoq jé jáng sheq htoq shit sháng gaq ga, ahkuì, yhang lé hai èq hkûm zîng tô é hkyô lé, nungmoq sê lhê. ⁷ Haû a tara é hkyo é haq dâ é a-tsam gi, mù zui nyi gù nghut bê; nghut kôlhang, haû lé hkûm zîng nyi sù gi, hui htot pyám huì é hkûn jé shoq, haû lé hkûm zîng nyi shirâ nghut lhê. ⁸ Haû hui htot pyám huì é hkûn, a tarâ Sû htoq shit râ nghut lhê; haû Yhumsîng Yesuq kúm gi, Yhâng nhut mâ é soq èq yhang lé sat pyám râ eq, Yhang gyó lo u lhê

é hpungwup mó èq, yhang lé lhoq htên pyám râ nghut lhê. ⁹ Haû a tarâ Sû lé lo é gi, Tsadán a-tsam dông laklai kumlhá pé, kumlhá pé, mauhpo muzó pé ajung jung kut mhaû é eq, ¹⁰ htên byoq huî nyi é bang lé mhaû zo râ agè ashop é hkyô jung hkgangmó lé tân shit râ nghut lhê. Yhangmoq htên byoq é gi, haû tengmán hkyô lé chyitdap luî hkyi yù hui râ nghut é hkyô lé he-ngik pyám kô é yanmai nghut ri. ¹¹ Hau é yanmai, Garai Gasang gi, haû tengmán hkyô lé a lumjǐng e za agè ashop hkyô má ô nau é lhunglhâng bang mara byi é hui kó sháng gaq ga, ¹² mhaû é dang lé jǐng kó râ matú, a-tsam mó bo é lum shut râ hkyô lé, yhangmoq chyáng nhâng byi bê nghut ri.

Mhoqshit é hkyô má gǐng nyi râ hkyô

¹³ Nghut kôlhang, haû Yhumsǐng chyitdap é gumang wui ê, ngamoq gi, hkâ-nhám le, nungmoq é matú Garai Gasang lé jeju hkya-on râ dut ri. Hkâsu mù gâ le, haû Woi-nyí èq lhoq sân-yúng nyi é muzó dông le, tengmán hkyô lé lumjǐng é dông le, hkyi yù hui râ matú, Garai Gasang gi, nungmoq lé, sâng-hi mai hkyin yù bê nghut ri. ¹⁴ Yhang gi, nga-nhúng é Yhumsǐng Yesuq Hkrisduq é hpungwup shing kang má, nungmoq wó bo lòm shoq ga, ngamoq é gabú danglù dông nungmoq lé shí hkyô má ji yù bê nghut lhê. ¹⁵ Haû mù luî, gumang wui ê, nhutdang dông nghut nghut, laiká dông nghut nghut, nungmoq lé ngamoq hai byi é mhoqshit hkyô lé zuí gǐng nyi luî, gǐng gǐng yap nyi keq.

¹⁶ Yhâng é jeju yanmai, nga-nhúng lé, ahtum abyuq é myit wum byi hkyô eq ge é myit myoqbyù hkyô lé byí é, nga-nhúng lé chyitdap é, nga-nhúng é

Îwa Garai Gasang eq nga-nhông é Yhumsîng Yesuq Hkrisduq gi, ¹⁷ nungmoq é i-myt má wum byi luî, ge é muzó eq ge é nhutdang lhumjup má, nungmoq lé wum-o lhoq kîng byi sháng gaq ô!

3

Kyû Dung Byi Râ Matú Lung Kat É Hkyô

¹ Gumang wuî ê, je htâng má pying kat nau é hkyô gi, nungmoq chyáng dut wú bê eq rajung za, haû Yhumsîng é mungdang gi, hân hân byo myín ló mù, lhoq gyaú é hui sháng gaq, ngamoq é matú kyû bo dung byi kó laq. ² Yuq hkgangmó gi, lumjîng myit bo é a nghut é yanmai, haû achayut agè ashop é byu pê chyáng mai ngamoq wó lut râ matú le, kyû bo dung byi kó laq. ³ Nghut kôlhâng, haû Yhumsîng gi, lhumzuî é sù nghut é yanmai, Yhang nungmoq lé wum-o lhoq kîng byi mù, haû agè ashop su chyáng mai nungmoq lé hung yù râ nghut lê. ⁴ Nungmoq gi, ngamoq pying tô é dang pé lé kut nyî mù, xoq luî le kut nyî râ nghut lê nghû, haû Yhumsîng má ngamoq hkyak myit lum tô lê. ⁵ Haû Yhumsîng gi, nungmoq lé Garai Gasâng é chyitdap hkyô eq Hkrisduq é hkam jân é hkyô má, shuî wàng sháng gaq ô!

Mû Zui Shikut Râ É Hkyô

⁶ Gumang wuî ê, ngamoq gi, ngamoq chyáng mai nungmoq hap yù bê ngamoq mhoqshit é hkyô dông a nyî yap é eq lagôn é gumang ó yuq eq le, we we nyî keq nghû, haû Yhumsîng Yesuq Hkrisduq é myîng mai nungmoq lé hkunmó hkyô kat lê. ⁷ Hkâsu mù gâ le, ngamoq kut é alik lé hká dông

cháng rã dut é gi, nungmoq yhang sê lhê. Ngamoq gi, nungmoq eq rahá nyi tô é hkûn, lagôn é hkyô a bo wú é htoq agó, ⁸ ó yuq é zoshuq lé le, ngùn a byî é a zo wú é nghut lhê. Nungmoq má ó yuq lé le wòlai a byi sháng gaq nghû, ngamoq gi, muzó shikut hkyô eq wuîhke hkyô má, nyí lé, myín lé, zui saí é nghut lhê. ⁹ Ngamoq gi, nungmoq lé garúm nhâng rã ahkáng a wó é a nghut, yhumsing gùng lé nungmoq cháng rã matú alik dut sháng gaq nghû sheq, haû su kut é ru nghut lhê. ¹⁰ Hkâsu mù gâ le, ngamoq, nungmoq eq rahá nyi é hkûn, "Mû a kâm zui sù gi, a zo sháng gaq." nghû, nungmoq lé ngamoq mai sang to bê nghut lhê.

¹¹ Hkâsu mù gâ le, nungmoq chyáng mã é byù ram lagon luî, haî mû le a zuî e za, mû châng lhoq gyô byî wún akô gâ é hkyô lé, ngamoq wó gyô é yanmai nghut lhê. ¹² Ngamoq gi, haû su kut é bang lé, zim za nyi mù zui saí luî, yhumsing é zoshuq ho nyi kó sháng gaq nghû, haû Yhumsing Yesuq Hkrisduq é mying lé lang luî, hkunmó hkyô kat mù, wum byî kat lhê. ¹³ Gumang wui ê, nungmoq kúm gi, ge é muzó kut é hkyô má, hkâ-nhám le, hkâ-ngú byuq bùm kó.

¹⁴ Byù rayuq yuq gi, laiká shî mã ngamoq mhoqshit é hkyô lé, a châng é nghut jáng, haú yuq lé rago chôm matsing yù mù, yhang hoq bun sháng gaq, yhang eq hkâzûm yap kó. ¹⁵ Nghut kôlhang, yhang lé gyè rayuq dông a sôn e za, gumang rayuq dông lhoq pun lhoq kyîng nyi keq.

Ló Htâng Lhê É Shi-kyám Dang

¹⁶ Haû nuingón hkyo é Yhumsing yhang gi, ahkyíng hkangmó eq hkyô hkat hkangmó má,

nungmoq lé ngingón hkyô byî nyî sháng gaq. Haû Yhumsîng gi, nungmoq banshoq bang eq ru nyî nyî sháng gaq.

¹⁷ Ngò, Poluq gi, ngá é loq mai yhang shi-kyám dang shî lé kê kat lê; shî gi, ngò kê é laiká banshoq má kumlhá nghut lê. Ngò kê é gi, shí dông chyat nghut lê.

¹⁸ Nga-nhûng é Yhumsîng Yesuq Hkrisduq é jeju gi, nungmoq banshoq bâng chyáng ru joq nyî sháng gaq ô!

Chyoiyúng chyumlaiká: dangshikaq asik; Zaiwa

New Testament in Zaiwa

copyright © 2009 Wycliffe Bible Translators, Inc.

Language: Zaiwa

Translation by: Wycliffe Bible Translators, Inc.

Copyright Information

© 2009, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

Printed book ISBN 9781921445408

The New Testament

in Zaiwa

© 2009, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses,

please contact the respective copyright owners.

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

23f9fc55-a8a4-59ef-9513-707ec336b0ee